



ANG

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Bayan

Edisyong Bisaya
Bolyum LV Ihap 11
Hunyo 7, 2024
www.philippinerevolution.nu



EDITORIAL

Dili higala sa katawhang Pilipino ang imperyalismong US

Pulos pagpangilad sa katawhang Pilipino ang deklarasyon sa gubyr-nong US isip "higala, kaabag ug alyado," o sa ilang "pinutos sa puthaw nga saad" nga "panalipdan ang Pilipinas." Sa lain-laing yugto sa kapin usa ka siglong kasaysayan sa nasud, subli-subli nga ginapagawas sa US nga kini alyado sa katawhang Pilipino sa ilang pakigbisog alang sa kagawasan. Sama sa gipagawas kaniadto sa US nga kini ang mitapos sa 300-ka tuig pagpa-ngolonya sa Kastila sa Pilipinas, o kaha nagpalayas sa Hapon niadtong ikaduhang gubat pangkalibutan, ginapagawas karon sa imperyalismong US nga kini ang manalipud sa Pilipinas batok sa China.

Sa okasyon sa ika-126 ka tuig sa deklarasyon sa mini nga kagawa-san sa Pilipinas, angayan lamang nga tun-an balik sa katawhang Pilipino ang tibuk kasaysayan sa pagpanakop ug paghari sa imperyalismong US sa Pilipinas, pagpangling-la, pagpangdaugdaug sa katawhan ug pagpangawkaw sa bahandi sa nasud.

Mas gikinahanglang ibutyag ka-

ron ang maong mga bakak sa US atubangan sa nagkadakung hulga sa seguridad sa Pilipinas tungod sa pagpanulsol sa US og gyera sa South China Sea batok sa imperyalistang karibal niining China. Kaa-bag ang papet nga rehimeng Marcos, ginatukmod sa US ang maong bahin sa kalibutan sa sidsid sa armadong kaguliyang. Matandi kini sa gihimo niining pagpanulsol

og gyera sa Ukraine batok sa Russia, ug pagsuporta sa henosidyo sa Israel batok sa katawhang Palesti-no sa Gaza, nga parehong nagre-sulta sa lapad nga pagkaguba ug pagkapatay sa liboang katawhan.

Ang mga kaguliyang karon sa South China Sea direktang resulta sa gideklara sa imperyalismong US nga "pagliyok sa Asia" niadtong 2011 isip estratehiya sa pag-atu-bang ug paghagit sa nagkadakung gahum sa ekonomiya ug militar sa China. Samtang gipagrabe sa US ang pakiglantugi sa karibal niining China sa ekonomiya ug pamatiga-yon, gipagrabe usab niini ang ar-madong paghagit dinhi, ilabina pi-naagi sa pagpakusog sa presen-syang militar niini sa mga isla o na-sud nga pinakaduul sa palibot sa

China.

Makanunayong ginapadaku sa US ang presensya sa mga pwersang militar niini sa South China Sea. Niadtong milabayng tuig, lakip ang tulo ka *carrier strike group* sa US (USS Nimitz, USS Carl Vinzon, USS Ronald Reagan) nga gisakyan sa kapin 7,500 ka tropa kada usa, ang misulod sa South China Sea ug p-subli-subli nga naglawig palibot niini sulod sa 30-35 ka adlaw. Sagad nga nagasulod ang US sa Bashi Channel sa tunga-tunga sa Pilipinas ug Taiwan, ug mibiyobiyo sa South China Sea ug West Philippine Sea.

Gawas dinhi, anaa usab sa South China Sea ug sa uban pang kadagatan palibot sa China ang klase-klaseng mga barkong iggugubat sa US, 11 ka submarinong adunay dalang mga armas nukleyar, dili maihap nga mga eroplano ug uban pang kahimanan, ug liboang tropang Amerikano nga naghimo og lain-lain maniobra, pagbansay ug pagpaniktik sa lugar. Niadto lamang miaging tuig, dili moubos sa 1,000 ka beses nga nagpalupad ang US og mga eroplanong pangsarbeylans ug pangbomba, lakip ang 100 ka beses nga pagduul dinhi sa mga baybay sa

China nga hapit makasangka sa mga eroplano sa China.

Gigamit sa US ang mga tawo-tawo niini sa Armed Forces of the Philippines (AFP) sa mga operasyon sa South China Sea. Nagtukod ang US og bag-ong mga base militar sa 17 ka lugar, lakip ang siyam nga nahimutang sulod sa mga kampo sa AFP ilalum sa Enhanced Defense Cooperation Agreement (EDCA), aron magsilbing han-ukanan sa armas, pahulayanan sa mga tropa, ug posibleng lunsaranan sa mga misayl. Pipila ka barko na ang gibaligya o gibalhin sa US sa AFP aron magamit sa Philippine Navy dungan sa mga operasyon sa US.



Aron panalipdan ang kaugalingong seguridad, nagpakusog usab ang China sa presensya niini sa South China Sea. Sukad 2013, nagtukod kini sa dili moubos sa pito ka pasilidad militar sa Spratly Islands, lakip ang tulo nga anaa sulod sa *exclusive economic zone* sa Pilipinas. Hilabihan ang kabalaka sa China nga bisan ang Scarborough Shoal, nga adunay taas nang kasaysayan nga ginasaluhan sa mga mangingisdang Pilipino ug Chinese, ang gipwestuhan na niini og mga bantay nga mga Coast

Guard. Giyatak-yatakan sa China ang mga katungod sa Pilipinas, partikular na sa gagmayng mangingisdang Pilipino.

Agresibo usab karong ginaduso sa China nga kinahanglang sundon sa Pilipinas ang kanhing saad niini (sugod pa sa panahon ni Arroyo) nga dili magtukod og permanenteng istruktura sa Ayungin Shoal. Tubag kini sa dayag nga pagsalikway sa AFP sa panaghisgot gikan Marso 2023, dihang magdala og mga gamit sa konstruksyon sa mga "supply mission" padulong sa natanggong didto nga BRP Sierra Madre. Ang pag-angkon sa Pilipinas sa Ayungin, nga gipaboran sa International Arbitral Tribunal subay sa United Nations Convention on the Laws of the Seas (UNCLOS) angayang isubay sa Pilipinas sa pormal nga pakigdayalogo sa China. Hinunua, gipaagi karon ni Marcos ug sa AFP sa mga probokatibong aksyong militar, sa sulsol sa US, nga gitubag usab sa China sa agresibo ug mahanggatong pamaagi.

Ang pagpanghulhog sa US ang nagpagrabe sa bangi sa Pilipinas ug sa China, partikular na sa mga utlanan ng tagsa-tagsang teritoryo sa kadagatan, mga hisgutanan nga angayang husayon sa malinawong panaghisgot, o bisan sa ligal o diplomatikong pamaagi, nga karon lisud himoon tungod sa pagpanghulhog militar sa US. Imbes nga iduso ang kaugalingong interes sa nasud alang sa malinawong pagtunhay sa China ug uban pang mga kasikbit nga nasud, nagpagamit si Marcos sa among imperyalistang US ug gipasagdang guyuron ang Pilipinas ug gamiton kining instrumento sa pagpanulsol og gubat.

Atubangan sa kasamtangang sitwasyon, kinahanglang masabtan sa katawhang Pilipino nga dili nila higala, kaabag o alyado, karon o sa miagi, ang imperyalismong US. Nagalihok ang US dili para sa interes sa Pilipinas o sa unsamang nasud, kundili para sa kaugalingong interes nga ipahamtang ang hegemonya sa lain-laing bahin sa kalibutan. **AB**

 <p>Bolyum LV Ihap 11 Hunyo 7, 2024</p> <p>Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.</p>	<h2>Unod</h2> <p>Editorial: Dili higala sa katawhang Pilipino ang imperyalismong US 1</p> <p>Ripleng R4, nakumpiska sa BHB sa Samar 3</p> <p>Operasyong kombatan sa Aurora, gipakyas sa BHB 3</p> <p>BKP, gilunsad sa Surigao del Sur 3</p> <p>Monopolyo sa Meralco, perwisyo 4</p> <p>"Fishing ban" sa China sa WPS, gihagit 5</p> <p>Mga protesta 5</p> <p>Pagpanghatag og yuta sa Palawan, binoang 6</p> <p>Freeze order sa akawnt sa NGO, gikwestyon 6</p> <p>Aurora, ginahimong industriyal-militar sa US 6</p> <p>"Luwas nga lugar" sa Gaza, gibomba ng Israel 7</p> <p>Upat ka mag-uuma, gipatay sa AFP 7</p> <p>Sa mubong pagkasulti 8</p> <p>La Niña ug mga katalagman 9</p> <p>Operation Kagaar sa India 10</p>
<p>Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas</p>	
<p> ang.bayan@cpp.ph</p>	

Ripleng R4, nakumpiska sa ambus sa BHB sa Western Samar

NAKUMPISKA SA BAGONG Hukbong Bayan (BHB)-Western Samar (Arnulfo Ortiz Command) ang usa ka ripleng R4 sa ambus niini batok sa 3rd IB sa Barangay Gayondato, San Jorge, Western Samar, niadtong Mayo 14 sa alas-9 sa buntag. Napatay sa opensiba si Cpl. Reycon Remedio ug usa ka sundalo ang nasamdan.

Matud sa taho, migawas sa kampo niini sa Barangay Gayondato ang mga sundalo sa 3rd IB aron maligo dihang pabuthan sila sa mga Pulang manggugubat.

Sa wala pa ang ambus, gilunsad usab sa BHB niadtong Mayo ang operasyong haras batok sa mga kampo sa CAFGU. Giharas sa hukbong bayan ang kampo sa CAFGU sa Barangay Santo Niño, Motiong ug sa Barangay San Fernando, Jiabong. Napatay dinhi ang usa ka sundalo ug usa ka elemento sa CAFGU.

Sa Oriental Mindoro, gipabuthan sa BHB-Mindoro (Lucio de Guzman Command) ang mga sundalo sa 4th IB nga anaa sa kampo militar niini sa Sityo Sigao, Barangay Lisap, Bongabong niadtong Mayo 20. Nakakampo ang mga sundalo sa maong sityo ug nagpahamtang og pagharing militar gikan pa niadtong 2022.

Sa Negros Oriental, naglunsad ang BHB-Central Negros (Leonardo Panaligan Command) og duha ka operasyong haras batok sa 62nd IB. Giatake nila ang base sa 62nd IB sa Barangay Malangsa, Vallehermoso niadtong Mayo 24 ug sa Barangay Hinakpan, Guihulngan City niadtong Mayo 27.

Operasyong kombat sa AFP sa Aurora, ginapakyas sa BHB ug masang mag-uuma

GINAPAKYAS SA BAGONG Hukbong Bayan (BHB) ug sa masang mag-uuma sa mga lungsod sa Maria Aurora ug Dipaculao sa Aurora ang walay-hunong nga *focused military operation* sa 91st IB ug 84th IB gikan pa niadtong Mayo. Dili moubos sa pito ka tropa sa militar ang napatay samtang duha ang nasamdan sa tulo ka magkasunod nga engkwentro niini sa hukbong bayan.

Nahitabo ang unang engkwentro sa Barangay Toytoy, Dipaculao niadtong Mayo 20, sunod ang panagsangka sa Barangay Salay, Dipaculao niadtong Mayo 21 ug usa pa niadtong Mayo 28 sa Barangay Bazal, Maria Aurora. Militanteng misukol ang hukbong bayan ug luwas nga nakamaniobra.

Sobra-sobra nga pwersang militar ang gibubu karon sa Armed Forces of the Philippines (AFP) sa duha ka lungsod aron gukdon ang ginasulti nilang "nahabilin" nga mga manggugubat sa BHB. Nagagamit ang AFP og mga helikopter, *drone* ug uban pang superyor nga armas para sa mga operasyong kombat niini.

Niadtong Mayo 20-21, duha ka helikopter ang gigamit sa 91st IB sa pagtuyok-tuyok sa unum ka barangay sa Dipaculao. Sunod niining gialirangan ang tulo ka barangay sa Maria Aurora kung asa naghulog sila og mga bomba sa mga bukid. Dugang dinhi, nagpaulan og bala ang 91st IB. Nataho ang pagkamatay sa usa ka batan-on tungod dinhi.

"Imbes nga igahin ang pondo sa katawhan sa paghatag og de-kalidad nga serbisyong publiko, nag-usik-usik ang AFP og milnilyong pondo sa makanunayong mga operasyong kombat," pamahayag sa BHB-Aurora.

Grabeng dislokasyon ug terorismo ang dala sa maong mga operasyon sa AFP sa sibilyang populasyon. Padayon silang gibawalan nga manginabuhi sa baryo ug bukid.

Sa rekord sa Department of Social Welfare and Development niadtong Mayo 25, mikabat sa 3,633 ka pamilya ang naapektuhan sa walay-hunong nga operasyong kombat sa AFP sa lugar.

Bata kang Kurso sa Partido, gipahigayon sa Surigao del Sur

NAKALAMPOS SA BATAKANG Kurso sa Partido (BKP) ang mga Pulang manggugubat sa Bagong Hukbong Bayan (BHB) ug myembro sa Partido Komunista ng Pilipinas niadtong unang semana sa Mayo sa kabukiran sa Surigao del Sur. Ang pagtuon gilunsad sa istagard nga pamaagi isip pagpahaum sa sitwasyong militar ug uban pang mga gimbuhaton sa hukbong bayan sa maong prubinsya.

Nagsugod ang pagtuon sa BKP niadtong Abril 10 ug upisyal nga nahuman niadtong Mayo 3. Usa ka seremonya sa pagtapos ang gilunsad nila niadtong Mayo 6 nga may temang "Ang Kadaugan sa BHB, Kadaugan sa Katawhan."

Sulod sa duha ka oras nga programa, nagpaambit og mga mensahe ang mga upisyal sa yunit sa BHB ug mga migradwar. Mabulukong pasundayag usab ang gipakita sa mga manggugubat sa kulturahong programa.

Tubag ang pagtuon sa mando sa Komite Sentral sa pagpatuman sa kalihukang pagtul-id. "Gilunsad namo ang BKP aron maarmasan sa teorya sa Marxismo-Leninismo-Maoismo ang among pwersa ilabina ang mga narekrut sa Partido nga wala gilayon nahatagn og edukasyon tungod sa giatubang nga apiking kahimtang bunga sa internal nga mga kahuyangan," pamahayag sa yunit.

Sa seremonya sa paggradwar, subli silang nanumpa sa Pulang bandera sa Partido aron palig-onon ang ilang baruganan ug palab-ason ang ilang pasalig.

Monopolyo sa Meralco sa serbisyong kuryente, perwisyo sa mga konsyumer niini

Karong Hunyo, gianunsiyo sa Manila Electric Company (Meralco) nga magpataas kini og kapin ₱0.10 kada *kilowatthour* (kWh) sa singil sa kuryente tungod kuno sa kakulang sa suplay. Ikanapulo na kini nga pagsaka sa singil sa milabayng 12 ka bulan. Bisan og adunay pipila ka bulan nga may pag-ubos sa *electricity rates*, gibanabanang moabot na sa ₱11.50 ang kasagarang singil sa kada kWh sa kuryente sa Meralco sa milabayng tuig. Buut pasabot, alang sa usa ka pamilyang nagakonsumo og abereyds nga 200 kWh kada bulan, ang kasagarang singil sa usa ka bulan nagdula sa ₱2,300, nga dakung kibhang sa suhol o sweldo sa mga ordinaryong mamumuo ug empleyado.

Napadaku sa Meralco ang kita sa kuryente sa walay puas ug deregularisadong pagpataas sa singil nga halos binulan. Niining milabayng tuig, nagdeklara kini sa ₱38 bilyong kita, nga mas daku kumpara sa kinatibuk-ang kita sa kumpanya gikan 1994 hangtud 2001, nga mikabat lamang og ₱28 bilyon.

Wala gitagad sa mga upisyal sa reaksyunaryong guberno ang pagsaka sa singil sa kuryente ug gihimong rason ang ting-init ug nagkataas nga konsumo. Apan maugagat sa kapin duha ka dekada nang palisaya sa deregulasyon ug pribatisasyon ang ingon niining sitwasyon.


Pinaagi sa Republic Act 9136 o ang Electric Power Industry Reform Act (EPIRA), hingpit nga giablihan ang industriya sa enerhiya dili lamang sa pribatisasyon apan bisan sa monopolisasyon. Nakasulat sa balaod nga laraw sa maong pagbuyangyang sa pangpublikong serbisyo sa kuryente sa pribadong pagpamuhunan nga mapaubos ang singil sa kuryente. Apan sukwahi ang nahitabo. Niadtong 2017, ₱8.03 ang singil sa Meralco sa kada *kilowatthour* sa kuryente. Misaka kini og ₱9.24 niadtong 2022, ug ₱11.50 karong tuiga.

Tungod sa EPIRA, ang tanang bahin sa sektor sa kuryente—gikan *generation* o pagmugna og kuryente, *transmission* o ang pagpadaloy sa dakung boltahe sa kuryente gikan

sa planta sa kuryente ngadto sa mga *substation*, *distribution* o ang paghatud sa kuryente sa mga konsyumer, ug suplay—kontrolado na sa pipila ka kumpanya ug pamilya, lakip ang San Miguel Corporation ni Ramon Ang, Metro Pacific Investments ni Manny V. Pangilinan, ug OneTaipan Holdings sa pamilyang Sy.

Gihimo usab sa EPIRA ang Wholesale Electricity Spot Market (WESM) nga nagsilbing merkado sa mga kumpanyang nagamugna og kuryente sa mga kumpanyang naga-*retail* niini (o mga *distributor* o kooperatiba). Sigon sa EPIRA, angyang isubay sa WESM ang presyo sa kuryente sa suplay ug *demand* atol mismo sa pagpalit.

Dugay nang nabutyag ang konsabuhay sa pipila ka kumpanya sa kuryente aron manipulahon ang presyo sa kuryente. Gakahitabo kini kung ianunsiyo sa usa ka kum-



panya sa distribusyon (sama sa Meralco) nga kulang ang suplay gikan sa regular niining tinubdan sa kuryente ug gikinahanglang mopalit sa WESM. Ang WESM, paspas nga magpataas sa presyo sa panahong nihit ang suplay.

Dili kahibulungan ang maong panagkonsabuhay tungod ang mga kumpanya ug mga pamilyang adunay kontrol sa Meralco ug uban pang mga kumpanya sa distribusyon, nanag-iyab usab sa lain pang bahin sa sektor sa kuryente. Pananglitan, gipanag-iyahan usab nilang Pangilinan, Ang, ug sa mga Aboitiz ang mga kumpanyang naga-padagan sa Ilijan Power Plant sa Batangas, nga usa sa dakung tinubdan sa Meralco sa suplay sa kuryente.

Kini ang hinungdan kung nganong daghan ang nanawagang imbestigahan ang mga serye sa “red alert” ug “yellow alert” nga gipagawas sa National Grid Corporation of the Philippines tungod kay posibleng artipisyal lang ang kakulang sa suplay aron mapatas-an ang singil.

Pagpadali sa franchise renewal

Upat ka tuig pa ayha matapos ang prangkisa sa Meralco ubos Republic Act No. 9209 nga gipirmahan ni Gloria Arroyo niadtong Hunyo 2003. Apan karon pa lang, gisumite na sa Kongreso ang pag-apruba sa balaod nga magpalungtad niini.

Patin-aw sa pipila ka magbabalaod sa reaksyunaryong kongreso, maaghat daw sa maong lakang ang mga posibleng mamuhunan sa *power industry*, nga magbunga man usab kuno og pagpamaayo sa serbisyo sa maong industriya.

Apan ang tinuod nga hinungdan? Paggarantiya sa supertubo sa Meralco, ug sa mga pamilyang burgesya kumprador nga nagpaluyo niini—nag-una na si Pangilinan sa

Sundi sa panid 5

“Fishing ban” sa China sa West PH Sea, gihagit sa mangingisdang Pilipino

Naglunsad og kolektibo o hiniyang pagpangisda ang Panatag Fisherfolks Association ug Pambansang Lakas ng Kilusang Mamalakaya ng Pilipinas (Pamalakaya) sa kadagatan duul sa Masinloc, Zambales niadtong Mayo 30 hangtud Mayo 31 isip paghagit sa gipahamtang sa China nga “fishing ban” o pagbawal nga mangisda. Gipahamtang kini gikan Mayo hangtud Setyembre 16, sa mga erya sa South China Sea nga “amihanang sa 12 degrees North latitude” kung asa kabahin ang Panatag Shoal (Scarborough), nga 124-nautical miles (224 kilometro) gikan sa Zambales.

Gawas sa mga mangingisda, mikuyog usab sa paglawig ang mga lider sa Bagong Alyansang Makabayan, Pilipinong Nagkakaisa Para sa Sobereanya, League of Filipino Students, ug Alliance of Concerned Teachers. Mikuyog usab ang mga representante sa Makabayan bloc nga silang Kabataan Rep. Raoul Manuel ug ACT Teachers Rep. France Castro.

Gawas sa pagsaway sa “fishing ban” sa China, gipanawagan usab sa ekspedisyong ang “hingpit nga demilitarisasyon” sa West Philippine Sea. Ang gipasabot sa grupo mao ang pagtukod sa China og mga isla ug ang agresyong militar sa imperyalistang US sa takuban sa mga operasyong “freedom of navigation” sa kadagatan.

Gimakmak usab nila ang bag-ong gihimong pagpamomba sa US sa kadagatan sa Zambales nga kabahin sa Balikatan war games. Sukad nga gilunsad kini, mikunhod ang nasikop nga isda ug kita sa matag pagpangisda.

Sa desisyon niini niadtong 2016 sa The Hague, gibasura sa Permanent Court of Arbitration ang ginaingong 9-dash line sa China nga misakop sa tibuok South China Sea. Naghisgot kini sa teritoryo sa dagat sa Pilipinas nga milangkub sa 12-nautical miles (22 kilometro) gikan sa mga baybay niini, ug ang 200-nautical miles nga exclusive economic zone ug mga extended continental shelf. Giila niining tradisyunal nga pangisdaanan sa mga mangingisdang Pilipino, Vietnamese ug Chinese ang Panatag Shoal ug giakusahang paglapas ang pagpugong sa China nga makapangisda sa kadagatan ang mga mangingisdang Pilipino. AB

Gikan sa panid 4

Metro Pacific Investments ug ang pamilya Gokongwei sa JG Summit Holdings.

Gusto usab nga papaspason sa Meralco ang pag-apruba sa bag-ong prangkisa niini aron dili makutikuti, mabutyag, ug maimbestigahan ang daghan nang natahong anomalya ug manipulasyon.

Dili unang beses nga nag-una ang Meralco sa ingon niining mga pakana. Niadtong 2002, gimando sa Korte Suprema sa Meralco nga ibalik sa mga konsyumer ang mokabat sa ₱28.15 bilyong gisingil niini tungod kay gipasa niini ang pipila ka galastuhon sama sa buwis sa mga konsyumer.

Sa prangkisang gihatag sa Meralco niadtong 2003, gitugutan kining magbaligya og kuryente sa 39 ka syudad ug 72 ka lungsod sa Metro Manila, Bulacan, Cavite, Rizal, ug pipila ka bahin sa Batangas, Laguna, Quezon, ug Pampanga. Giserbisyuhan niini ang 7.8 milyong animalay sa maong mga prubinsya. AB



VFA, ibasura. Nagprotesta ang mga demokratikong organisasyon sa Cebu City niadtong Mayo 27 aron subling ipanawagan ang pagbasura sa Visiting Forces Agreement tali sa Pilipinas ug sa imperyalistang US. Kadungan kini sa ika-25 anibersaryo sukad nga ratipikahan kini sa Senado ilalum sa rehimeng Estrada niadtong Mayo 27, 1999. Gipangunahan ang protesta sa Bagong Alyansang Makabayan-Central Visayas.

Hunong-pasada sa Iloilo, gikasa. Naghunong-pasada ang mga drayber sa ginatawag nga “first town” o mga lungsod sa palibot sa Iloilo City niadtong Hunyo 3 aron babagan ang Local Public Transport Route Plan (LPTRP) sa syudad nga maglimita sa ihap sa dyip nga mosulod dinhi. Hilabihang maapektuhan dinhi ang mga drayber ug komyuter gikan sa mga lungsod sa Leganes, Pavia, Oton ug San Miguel sa maong iskema. Ang LPTRP kasumpay sa makilangyaw nga PUVMP o jeepney phaseout. Natukmod nila ang gobernador sa Iloilo nga atubangon sila sa usa ka dayalogo niadtong adlaw.

Kampuhan kontra komersyalisasyon sa UP-Diliman. Naglunsad og kampuhan ang mga estudyante sa University of the Philippines (UP)-Diliman niadtong Mayo 30-31 aron babagan ang nagkagrabeng komersyalisasyon sa unibersidad ug nakatakang pag-abli sa bag-ong mall sa kampus niini sa Quezon City. Kauban nila sa kampuhan ang mga manindahay nga hilabihang maapektuhan sa pagsulod sa dagkung pribadong negosyo sa kampus. Gisugat nila og protesta niadtong Mayo 31 ang tigum sa UP Board of Regents.

Mandatory ROTC, batukan. Nagprotesta ang kabatan-onang Pilipino atubangan sa Senado sa Pasay City niadtong Mayo 22 aron ipadayag ang ilang pag-supak sa pagratsada sa sugyot balaodnong Mandatory Reserve Officers' Training Corps sa Senado. Niadtong Abril, gipadayag sa pipila ka senador ang plano nilang pagratsada sa maong mapanumpuon balaodnon ayha mahuman ang sesyon sa Senado.

Pag-apud-apud og yuta sa Palawan, dakung binuang

Pag-apud-apud og yuta sa Palawan, dakung binuang sa Department of Agrarian Reform (DAR) kung asa 2,046 ka residente sa Palawan ang natanyagan og CLOA (Certificate of Land Ownership Award) ug mga makinaryang pang-uma. Gihimo ang seremonya sa PGP Convention Centre, Palawan niadtong Abril 11. Gitambungan pa kini sa kalihim sa departamento ug tag-as nga upisyal sa prubinsya.

Ang tinuod, pakulo lamang ang pagpanghatag sa CLOA. Matud sa usa ka tumatambong “photo ops” o pangletrato lang ang nahitabo. Ang mga CLOA nga gipanghatag wala nakapangalan sa mga gihatagan niini. Dili usab ang yutang ilang ginaugmad ang nakabutang sa papel nga gipanghatag. Mas grabe, “recycle” lamang kini tungod kay dugay nang adunay CLOA ang mga mag-uumang gipatambong.

“Wala ko misalmot, wala usab nako gikuha ang CLOA nga dili sa ako nakapangalan, ug wala pud ko miapil sa pag-picture,” saysay sa usa ka nanay nga giimbata sa maong pasundayag. Dili siya gustong magpagamit sa pagpangilad sa DAR.

Usa ka upisyal sa kooperatiba sa *palm oil* ang nabiktima sa pagpangilad ug midawat sa CLOA nga wala nakapangalan kaniya. “Nag-usik-usik lamang og kwarta ang guberno, aron lang ingong nanghatag sila og yuta,” matud niya. “Ang among CLOA panahon pa ni Ramos gihatag.”

Estilong “hakot” ang gihimo sa DAR alang sa pasundayag nga pag-apud-apud. Gitubag tanan sa departamento ang galastuhon dinhi, lakip ang pamilite (paadto ug pauli) sa mga “benepisyaryo” nga naggikan pa sa halayong munisipalidad. Baha usab ang pagkaon ug meryenda. Nanghatag pa og mga *t-shirt* nga adunay nakatatak nga “Sariling Lupa para sa Bagong Bukas na Masagana” (Kaugalingong Yuta alang sa Bag-ong Kaugmaon nga Mauswagon) nga may mga nawong ni Ferdinand Marcos Jr.

“Bistado kaayo ang pagpapogi ni Marcos Jr,” matud sa mga mag-uuma.

AB

"Freeze order" sa akawnt sa bangko sa mga NGO, kinwestyon sa korte

GIKWESTYON SA Citizen's Disaster Response Center Foundation (CDRC) ug Leyte Center for Development Enterprise, Inc. (LCDE) ang gipahamtang nga "freeze order" sa Anti-Money Laundering Council sa ilang mga akawnt sa bangko. Nagpetisyon ang CDRC sa Court of Appeals sa Quezon City niadtong Hunyo 2 samtang ang LCDE niadtong Mayo 17 sa parehong korte sa Cebu City. Tumong nilang ipatangtang kini ug hagiton ang ligalidad sa sangsyon nga matud nila wala miagi sa hustong proseso, ug lapas sa mga katungod sa gawasong pagpadayag ug asosasyon.

Ang CDRC ug LCDE duha lamang sa daghan nang mga asosasyong progresibo ug organisasyong pangkalambuan nga arbitraryong gipahamtangan og "freeze order" human giakusahan og "terrorism financing."

Ang maong pagpamig-ot nakagambalay sa gipagula sa rehimeng Marcos nga National Security Plan 2023-2028. Dayag nga nahisgutan dinhi ang palisiyang pakusgon ang aksyon batok sa giakusahan niining mga ligal nga prente sa "CPP-NPA-NDF aron putlon... ang tinubdan sa pinansya." Kinsamang gitakda niining adunay kalambigitan sa rebolusyonaryong kalihukan, ang basta-basta ug walay-basihang ginapig-ot.

Aurora, gihimong engklabong industriyal-militar sa US ug AFP

NIADTONG MARSO, gibisita ni Gilbert Teodoro Jr, kalihim sa depensa, ang usa ka baseng nabal sa Casiguran, Aurora. Kini nga base gitukod sa AFP sa pakigtinabangay sa Aurora Pacific Economic Zone and Freeport Authority (APECO) aron kontrahon kuno ang presensya sa China sa Benham Rise. Ayha niini, misulod sa kasabutan ang APECO sa Philippine Aerospace Development Corporation (PADC) aron itransporma ang engklabo isip “defense hub” (sentrong pandepensa) sa nasud. Laraw sa maong pagtapo ang pagtukod sa sonang pang-industriyal-militar sulod sa 12,923-ektaryang engklabo sa pamuo.

Matud ni Teodoro, ang transpormasyon sa APECO nagsubay sa Comprehensive Archipelagic Defense Concept (CADC) sa AFP, nga nakagambalay sa pangkinatibuk-ang estratehiya sa US sa Asia Pacific. Pagagamiton kuno ang APECO alang sa Self-Reliant Defense Posture Program nga nakapailalum sa modernisasyon sa AFP. Mahimo kining sentro sa pagmantine ug pag-ayo sa mga sakyang pangkahanginan sa militar. Gipanghinambog usab niining kini ang mahimong sentro sa pagmanupaktura og mga *drone*.

Liboang mag-uuma, mangingisda ug katutubong Aeta sa Casiguran ang giilugan og yuta ug gipalayas sa ilang mga komunidad dihang unang gilatang ang APECO. Ang transpormasyon niini ngadto sa base ug engklabong industriyal-militar labaw nga magpgrabe sa pagpanumpo ug pagpangaw-kaw sa yuta sa masang mag-uuma ug nasudnong minorya sa prubinsya.

Gihimong panghadlok ug aktwal nga ginagamit sa AFP sa katawhan ang mga modernong kahimanan niini sa pagpamomba, pagpanganyon ug paturagas nga pagpamusil sa komunidad sa mag-uuma. Bag-o lang, gibomba niini ang mga komunidad sa Dipaculao ug Maria Aurora. Gamit ang mga *drone*, gipagrabe niini ang pagsubaybay sa aktibidad sa masa ug sa tibuk sibilyang populasyon.

"Luwas nga lugar" sa Gaza, gibomba sa Israel

Magkasunod nga pagpamomba ug pag-atake ang gilunsad sa Zionistang Israel sa una nang giila niining "luwas nga lugar" sa Rafah, sa habagatang bahin sa Gaza, sugod niadtong ulahing semana sa Mayo. Gihimo kini sa Israel taliwala sa bag-ong desisyon sa International Court of Justice, nag-unang korte sa United Nations, niadtong Mayo 24 nga nagmando nga "dihahang ihunong ang opensibang militar, ug unsamang aksyon sa Rafah."

Niadtong Mayo 26, dili moubos sa 49 katawo ang napatay ug 250 ang nasamdan sa *airstrike* sa Israel sa "tent camp" (temporaryong lugar sa ebakwasyon) sa Al-Sultan sa Rafah. Duha ka adlaw ang milabay, gibomba sa mga pwersang Israeli ang *tent camp* sa Al-Masawi sa Rafah nga mipatay sa 21 ka Palestino ug 64 ang nasamdan. Katunga sa mga biktima mga bata, babaye ug tiguwang. Naa-bo ang temporaryong kampo nga gisilungan sa mga mibakwit sa Rafah nga pulos gama sa mga trapal.

Kasamtangang gisilungan sa kapin 1.5 milyong Palestino ang Rafah sukad nga giatake sa Israel ang Gaza niadtong miaging tuig. Nagtukod sila dinhi ug mga balay-

balay ug nagpasilong sa mga *tent* kung asa kulang kaayo sa pagkaon ug tambal, ug makaluluoy ang kahimtang sa mga mibakwit.

Niadtong Hunyo 4, mikabat na sa 36,550 ang napatay, lakip ang 15,000 ka bata, sa henosidyo sa Zionistang Israel, samtang 82,959 ang nasamdan. Gatasan ka libong Palestino na ang napahawa ug napalayas sa ilang mga komunidad.

Pilipino para sa Palestine

Nagpadayon ang suporta sa mga Pilipino sa mga Palestino atubangan sa walay hunong nga mga pag-atake dinhi sa Zionistang Israel.

Niadtong Mayo 30, nagtapok ang lain-laing organisasyong masa

sa University of the Philippines (UP)-Los Baños aron suportahan ang pakigbisog sa mga Palestino. Naglunsad usab og martsa ug panagtapok sa UP Diliman niadtong Mayo 19.

Samtang, nanawagan ang PUP for Palestine kang Quezon City Mayor Joy Belmonte ug ang Negrenses for Palestine kang Negros Occidental Governor Eugenio Lacson nga putlon ang pakig-lambigit nila sa mga upisyal sa Israel. Kini human sa pakigpulong nilang Belmonte ug Lacson sa mga upisyal sa Israel.

Sa Canada, nakighiusa ang mga grupong Pilipino sa protesta niadtong Mayo 29 sa Ottawa aron ipanawagan ang imbestigasyon sa pagbaligya og armas sa estado sa Canada sa Zionistang rehimen sa Israel. Panawagan usab nilang ipasurado ang CANSEC, ang tinuig nga *arms show* o merkado sa armas sa Canadian Association of Defence and Security Industries, na nag-abli sa Ottawa niadtong adlaw. AB

Upat ka mag-uuma, gipatay sa mga pwersa sa estado

Upat ka mag-uuma ang gipatay sa Armed Forces of the Philippines (AFP) sa Masbate ug Negros Occidental niadtong Mayo. Pare-pareho silang gipagawas nga myembro sa Bagong Hukbong Bayan nga napatay sa "engkwentro." Nataho usab sa milabayng bulan ang pag-aresto sa tulo ka sibilyan, lakip ang usa ka gamayng bata.

Pagpatay. Sa Masbate, gipatay sa 96th IB ang 31-anyos nga mag-uumang si Erlindo Natural niadtong Mayo 7 sa Barangay Holjogon, Mobo. Si Natural ang ika-29 nga biktima sa pulitikanhong pagpamatay sa prubinsya ilalum sa rehimeng Marcos.

Sa Negros Occidental, giatake sa dili moubos sa 24 ka tropa sa 62nd IB ang balay sa pamilyang dela Peña sa Sityo Inangaw, Barangay Quintin Remo, Moises Padilla niadtong Mayo 21 sa buntag. Gipaulanan kini og bala ayha iligal nga giaresto sa mga sundalo si Richard dela Peña, gidala palayo sa iyang balay ug tinuyong gipatay.

Niadtong Mayo 22, tinuyong gi-

patay sa mga sundalo sa 79th IB ang mag-uumang si Jeje Redobles sa Sityo Manaysay, Barangay Camabayobo, Calatrava. Si Redobles usa ka yanong mag-uuma sa kamote ug saging.

Niadto usang Mayo 30, patay ug nakahiagum og upat ka igo pinusilan ang mag-uumang si Jigger Barotolo sa Sityo Sangay, Barangay Hilub-ang, Calatrava. Gipatawag siya sa mga ahente sa 79th IB gikan sa pagpasabsab sa iyang kabaw ug ayha gipatay.

Pag-aresto. Sa Masbate, giaresto sa mga pwersa sa estado si Tinay Ontog sa Barangay Maglambong, lungsod sa Monreal niadtong Mayo 18.


Sa wala naklarong petsa, giaresto usab sa mga pwersa sa estado si Baby Arnejo ug iyang anak sa Barangay Madao, Uson. Sa paghingusog sa iyang mga silingan, nabawi ang gamayng bata ug nabutang sa maayong kustodiya samtang napriso pa gihapon ang iyang inahan.

Pagdagit. Kapin duha ka bulan nang nawala ang ulitawong si Joy Delica, 32-anyos, sukad nga gidagit siya sa dili moubos sa 30 ka sundalo sa 4th ID sa balay nga iyang gisakan sa Barangay New Compostella, Damulog, Bukidnon niadtong Marso 18. Gigapos ang mga kamot ug tiil ni Delica ug gisakay sa sakyanan sa mga sundalo.

Gibawalan sa mga sundalo ang mga residente nga nanghingusog nga ubanan si Delica aron masiguro ang iyang kaluwasan. Hangtud karon, wala pa siya nakaplagan. AB

107 dagkung war games


ang gilunsad sa US sa South China Sea ug duul nga erya dinhi niadtong 2023; 80 duyog ang Japan, ug 11 sa kayutaan ug kadagatan sa Pilipinas.



1,000

ka hugna nga nagpalupad og mga eroplanong iggugubat ang US sa South China Sea, gikan sa Okinawa (Japan), Osan (South Korea) ug Clark Air Base (Pilipinas) niadtong 2023.


Gikan sa: An Incomplete Report on US Military Activities in the South China Sea in 2023, the South China Sea Strategic Situation Probing Initiative, Marso 2024



P10,000 na!

ang alawans sa mga titser pangpalit og mga suplay sa eskwelahan kada tuig.

Nabalaod kini human ang 13 ka tuig nga pagduso sa mga titser ug ACT Teachers Partylist.



835

ka agalong yutaan ug dagkung burgesya kumprador ang nagakontrol sa 70% sa kinatibuk-ang yutang agrikultural sa Southern Tagalog.

Gikan sa: Kalatas, Marso 2024

19 sa 20


biktima sa sekswal nga kalapasan sa mga lugar nga may armadong kaguliyang mga kababainhan ug batang babaye.

Pinagkunan: UN Secretary-General on Conflict-related Sexual Violence, Enero 2023-Disyembre 20234

159


insidente sa Red-tagging sa mga myembro sa midya ang nadokumento sa NUJP gikan 2016 hangtud sa kasamtangan, 96 ang gihimo sa reaksyunaryong estado ug mga ahente niini.

Gikan sa: No Tag: Press Freedom for Pluralism, 2024



₱389 MILYON

kadaut sa pipila ka adlaw nga paghampak sa **Bagyong Aghon**, ang unang bagyong miigo sa Pilipinas karong tuiga.



\$315 trilyon

na ang kalibutanong utang karong 2024, halos triple (257%) sa kalibutanong GDP (gross domestic product). 2/3 niini ang utang sa US ug Japan.

Gikan sa: Global Debt Monitor, Institute of International Finance

La Niña ug ang katalagmang gibunga sa paggun-ub sa kinaiyahan

Samtang misulod sa ting-ulan ang Pilipinas karong Hunyo, nagatransisyon usab ang klima gikan El Niño ngadto sa La Niña. Niadtong Mayo, gibutang na sa PAGASA sa 69% nga lagmit moigo ang La Niña sa bulan sa Hulyo-Setyembre. Nagkinaiya kini sa mas sagad ug mas kusog nga pag-ulan, nga siguradong magdala og mas grabeng pagbaha, pagdahili sa yuta ug bagyo.

Ang El Niño ug La Niña mao ang duha ka yugto sa penomenang pangklima nga gitawag og El Niño Southern Oscillation o ENSO. Ang ENSO nagkinaiya sa dili regular nga pag-usab sa hangin ug temperatura sa dagat Pasipiko. Ginapagrabe ang mga epekto niini sa pag-init sa temperatura sa tibuok kalibutan tungod sa paggamit og fossil fuel alang sa enerhiya, transportasyon ug produksyon sa industriya.

Nakasinati na ang Pilipinas sa dili moubos sa lima ka siklo sa La Niña gikan dekada 1980. Nagkamubo ang gintang sa kada siklo ug nagkadaku ang kadaut nga gibunga niini sa nasud. Sa La Niña niadtong 1988-1989, mikabat sa ₱900 milyon ang gibanabanang nadaut sa mga pananum. Nakahiagum ang nasud sa duha ka magkasunod nga La Niña nga 10 ka tuig ang gintang—1998-2001 ug 2010-2011. Medyo milungtad ang La Niña hangtud sayong bahin sa 2012 nga nagpagrabe sa mga bagyong miigo sa nasud, ilabina sa Mindanao.

Kapin 1,000 ang natahong namatay, 900 ang wala na nakita ug liboan ang nawad-an og panimalay dihang mihampak niadtong Disyembre 2012 ang Bagyong Pablo (internasyunal nga pangalan: Bopha) sa rehiyon sa Davao. Kapin 1,200 usab ang namatay ug susama ka daghan ang nawala sa Region 10, partikular sa Cagayan de Oro, dihang mihampak ang Bagyong Sendong (Washi) niadtong Disyembre 2011. Wala pay lima ka tuig, subling nahitabo ang La Niña (2016-2017). Gipagrabe sa maong La Niña ang Bagyong Niña (Nock-Ten, 2016) nga miigo sa rehiyon sa Bicol.

Ulahing naunlod sa La Niña ang Pilipinas niadtong 2020-2022. Sa tuig 2020 lamang, 23 ka bagyo ang miigo sa Pilipinas, mas taas sa kasagaran 20 ka bagyo kada tuig. Labing kusog dinhi ang Bagyong Rolly (Goni, 2020) ug Ulysses (Vamco, 2020) nga miigo sa Visayas ug North Luzon. Gibanabanang kapin ₱40 bilyon (o ₱20 bilyon kada usa) ang kadaut nga gibunga sa maong duha ka bagyo. Halos wala nay gintang ang nagpatunga sa pagtapos sa La Niña, ayha subling misulod ang lain na usab nga siklo sa ENSO niadtong Hulyo 2023.

Pagguba sa kinaiyahan ug ENSO

Sa mga bagyong Pablo ug Sendong, tin-aw nga hinungdan sa kamamatay nga mga pagbaha ang pagkaupaw sa lasang kung asa midagday ang tubig gikan sa kabukiran ngadto sa mas ubos nga lugar sa mga baybay. Apan labaw dinhi, mas lapad ang epekto sa pag-upaw sa lasang sa Pilipinas sa siklo sa ENSO sa Pasipiko.

Sa usa ka pagtuon niadtong 2023, napirmi sa mga syentista ang dakung papel sa pagkaupaw sa lasang sa gitawag og Maritime Continent (MC) sa pagsigi ug paggrabe sa ENSO niining milabayng mga dekada. Ang MC gilangkuban sa Indonesia, New Guinea, Malay Peninsula, Pilipinas ug sa kadatang nakapalibot dinhi. Matud nila, tungod sa pagkaupaw sa mga lasang sa maong mga nasud, misaka og 11.7% ang



posibilidad sa pagmugna sa mas komplikado ug dili matagna nga mga El Niño; samtang 14.6% ang La Niña.

Ang maong mga pagkaupaw nang-una tungod sa kumbersyon sa yuta, komersyal nga pagtroso ug paglatag og mga komersyal nga plantasyon sa kahoy, ug malukpanon ug magun-ubong mina.

Ang labing nagaantus sa kadaut sa La Niña mao ang mga nasudnong minorya ug mag-uuma, nga nawad-an og panimalay ug panginabuhian sa matag paghampak sa mga bagyo ug pagbaha. Husto nilang ginasingil ang mga kumpanya sa mina ug plantasyon nga maghatag-danyos sa kadaut nga nahiaagum sa ilang mga komunidad tungod sa pagkaw-kaw ug paggun-ub niini sa kinaiyahan.

Pananglitan niini ang pagpanghingsog sa mga residente sa Masara, Davao de Oro (kanhing Compostela Valley) nga ayuhon sa Apex Mining Corporation ang nagubang mga dalan ug tulay sa lungsod human sa bagyong Pablo. Sa Cagayan Valley, panawagan usab sa mga mag-uuma nga ipahunong ang pagpaningil o dili dayon singlon ang ilang mga utang sa produksyon aron mahatagan sila og higayon nga makabawi sa sunod nga siklo sa tingtanum. Dungan niini, giduso nila sa reaksyunaryong estado nga maggahin og pondong danyos para sa mga balay ug panginabuhian nga naguba.

Operation Kagaar: Brutal nga gyera batok sa katawhang Indian

Duguan ang kamot sa reaksyunaryong estado sa India sa mas gipagrabeng gyera sa pagpanumpo sa katawhan niini. Gikan Enero, gilunsad niini ang Operation Kagaar, kabahin sa gipalapad nga pagpahamtang sa kontra-insurhensyang kampanya na Operation SAMADHAN-Prahar. Dili moubos sa 130 na ka sibilyan ug mga rebolusyonaryo ang napatay sa maong hugaw ug brutal nga operasyon sa milabayng lima ka bulan.

Sa direktang paghubad, ang puulong nga *kagaar* nagpasabot sa "katapusan." Matud sa estado sa India, laraw sa maong operasyon nga hingpit nang tapuson ang armadong rebolusyonaryong kalihukan sa katawhang Indian, nga ginapangulohan sa Communist Party of India (Maoist), nga karon anaa na "sidsid" sa pagkapildi.

Nag-unang ginapatuman ang operasyon sa Abujhmad (o Maad), usa ka bukiron ug lasangong rehiyon sa habagatan sa estado sa Chhattisgarh. Laraw niining "ilingkawas ang Maad" nga giilang nag-unang kuta sa mga Maoista. Sa kasamtangan, ginapatuman na kini sa mas dakung bahin sa rehiyong Dandakaranya nga langkub sa mga estado sa Chhattisgarh, Odisha, Telangana, ug Andhra Pradesh sa Central India.

Gitawag ang operasyon isip "opensibang militar" batok sa mga Maoista, apan ang tinuud, ginatarget niini ang tanang partido, organisasyon ug indibidwal nga nagabatok sa estado.

Pagyatak sa internasyunal nga makitawhanong balaod

Dayag nga ginalapas sa Operation Kagaar ang internasyunal nga makitawhanong balaod, mga lagda sa gubat ug mga talagsaong proteksyon sa mga bulnerableng sektor sa panahon sa armadong kaguliyang. Labing nabiktima sa pasismong Brahmanic Hindutva (pasismo sa estadong Indian batok sa mga minorityang relihiyon ug ubos nga grupo sa katilingban) ang mga Adivasi o mga katutubo.


Sulod lamang sa duha ka semana niadtong Mayo, 22 na ka mga Adivasi, lakip ang duha ka bata, ang gipatay sa mga pwersang militar sa Chhattisgarh.

Gimasaker sa paramilitar sa Bijapur ang 12 ka Adivasi niadtong Mayo 11. Nanguha og mga dahon sa *tendu* (ginagamit panglikit) ang mga biktima dihang gidagit ug gipatay. Gipriso pa sa estado ang 30 ka mga aktibista, mga balo sa biktima, ug pamilya nga mokuha unta sa mga patayng lawas sa gimasaker.

Pagkaugma, duha ka bata ang namatay ug daghan ang nasamdan sa pagbusikad sa usa ka bala sa *mortar* nga gibiyagan sa mga paramilitar sa Odpara, Bijapur. Ang *mortar* lakip sa daghang bala sa kanyon nga wala mibusikad dihang nanganon ang mga pwersang militar sa kabukiran sa maong lugar.

Niadtong Mayo 24, walo ka mag-uumang Adivasi ang giaresto ug gipusil-patay sa pwersang militar sa India sa Rekavaya, anaa sa utlanan sa Bijapur ug Narayanpur. Lain pang mag-uuma ang nasamdan.

Samtang niadtong Abril 16 sa kalasangan sa Aapatola-Kalpar, distrito sa Kanker, brutal nga gi-



tortur ayha tinuyong gipatay sa pwersang militar sa India ang 11 ka dili armadong mga rebolusyonaryo ug unum ang nasamdan sa unang hugna sa pag-atake. Namartir sa unang pag-atake ang 12 ka manggugubat sa People's Liberation Guerilla Army.

Tinuyo usab nga gipatay human giaresto sa Kakur-Tekametta sa utlanan sa estado sa Chhattisgarh ug Maharashtra niadtong Abril 30 ang 66-anyos nga si Cheemala Narasayya (Ka Joganna), myembro sa rehiyunal nga komite sa CPI (Maoist). Kaniadtong adlaw, upat ka Adivasi ang gipatay sa pagpamusil sa maong lugar.

Sagad nga ginapagawas sa pwersang militar sa India nga napatay ang mga biktima sa mga "engkwentro" niini sa mga Maoista. Gawas dinhi, sunud-sunod ang pagtukod og mga kampo-militar sa mga komunidad sa langkub sa Maad.

Kadungan ang Operation Kagaar ug katimbayayong niining militarisasyon sa korporatisasyon ug pagsulod sa dagkung mga kumpanya sa bahandianong lasang sa India. Sa takuban sa pagbatok sa mga Maoista, nagsilbi ang maong mga operasyon sa pagpagrabe sa pagpangawkaw sa mga langyawng dagkung korporasyon sa bahandi sa nasud.

AB